

孔府檔案史料選

(三)



成化修刊孔氏宗谱关于历朝崇奉孔子优礼后裔的记载

〔成化年间修刊孔氏宗谱（一）（〇〇〇六）之一〕

……哀公十六年，孔子病，梦坐奠于两楹间。子贡请见，方曳杖逍遥于门，歌曰，泰山颓乎，梁木坏乎，哲人萎乎。因以涕下。谓子贡曰，天下无道久矣，莫能宗予，盖寝疾七日而薨。是年夏四月己丑也，年七十四。哀公诔孔子曰，天下不遗耆老，莫相予位焉，呜呼哀哉。尼父葬鲁城北，泗水为之却流，弟子皆服心丧。三年毕，相诀而去，哭尽其哀，或复留。唯子贡庐于墓者六年，然后去。弟子或鲁人往从冢家者百余，遂命曰孔里。鲁人相传，岁时奉祀。子孙世袭弟子于庙，藏衣冠、琴瑟、车书，至汉二百余年不绝。高帝十二年十一月，行自淮南，还过鲁，以太牢祠焉。诸侯卿相至，常先谒，然后从事。唐贞观十一年，诏修宣尼庙于兖州，给二千户享祀。开元二十七年八月，封文宣。制曰，弘我王化，在乎儒术，孰能发挥此道，启迪含灵，则生民以来，未有若夫子者也。所谓自天攸纵，将圣多能，德配乾坤，身揭日月，故能立天下之大本，成天下之大经。美教化、移风俗。君君、臣臣、父父、子子，民到于今受其赐，不其猗欤。乌戏。楚王莫封，鲁公不用，俾夫大圣，才列陪

臣，栖遑旅人，国可知矣。年紀浸远，光灵益彰，虽代有褒称，而未为崇峻，不付于实，人其谓何，夫子既称先圣，可追谥为文宣王。宜令三公持节册命，其文宣陵并旧宅之庙，赐百户洒扫。封百缗，充春秋飨奠。后嗣为文宣公，每代取长子一人袭封。朝会二王三恪，兼赐一子官。仍令天下州县立碑。宋建隆三年，诏文宣王庙，立戟二十六枚。乾德四年七月，以四十四代孙陵庙王进士孔宜为兖州曲阜县主簿。太平兴国三年十月，诏免文宣公家租税。大中祥符元年十月，追谥夫子为玄圣文宣王，并修饰祀庙祭器，赐田百顷，仍差官以太牢致祭。十一月东封礼毕，驾幸曲阜，谒先圣庙，行酌献之礼。又幸叔梁纥堂，召见孔氏子孙，问宣尼坟陇所在，令子孙导致孔林，设奠再拜。因问东及南二冢，子孙对曰，东伯鱼、南子思。上太息踟蹰久之。敕叔梁纥追封齐国公，颜氏鲁国太夫人，元官氏郚国夫人。二年，诏赐曲阜庙桓圭。五年十二月，改谥夫子为至圣文宣王。嘉祐六年三月，御书庙额六字，遣中使置之本庙。上尝谓辅臣曰，兖州孔子庙自祖宗以来，皆以子孙世知县事奉祠祭，今乃不然，非所以崇儒术导先圣也。其诏自今，仙源县复选孔氏子弟为之。元丰元年，诏兖州常以省钱修葺先圣祠。元丰五年，给度牒三十本，修先圣庙。立伯鱼、子思二祠堂。元祐元年，添赐田一百大顷，添差洒扫户五十人，看林户五人。赐监书，置教授官一员。衍圣公每遇亲祠大礼，冬正朝会，许赴阙陪位。六年十月庚午，祇谒先圣。绍圣三年，系省钱内支三千贯修庙。崇宁三年九月十七日，诏文宣王殿以大成为名。十一月四日，祇谒先圣。四年，诏考正冠服制度，始服王者之服。大观元年，旨令于系省钱内应付修庙。诏不许采斫林木。政和元年，改执镇圭，立二十四戟。六年五月，赐大乐礼器各一付，并三献法服。八月十五日，定以仲

春、仲秋上丁释奠文宣王。宣和四年三月一日，祇谒先圣。绍兴八年，赐孔玠衢州田五顷。十年七月二十三日，正文宣王为大祀，用十二笾豆，受誓戒。十一年，增祀十哲。十四年正月，诏赐真玉圭。乾道五年十一月，诏修庙。淳熙四年二月五日，祇谒先圣。诏南库支二万緡修庙。嘉泰三年正月戊戌，祇谒先圣。宝祐元年，诏衢州建立宣圣家庙。金皇统元年二月戊午，谒文宣王庙。三月己巳，祇谒先圣，御制赞文。先是，丁未岁，睿宗至曲阜，谒庙，杀伐墓者十二人。二年，勅拨钱一万四千贯修庙。四年，降钱一万四千五百贯，创盖大成殿。大定十八年，以皇统修庙羡钱修郛国夫人殿。二十二年十二月十三日，奏立宣圣庙碑。明昌元年三月，降钱八万三千贯有奇修庙，贴拨官田一百二十三顷二亩。四年八月丁未，置产六十大顷。五年，出羨钱一万四千有奇，建尼山庙。六年，赐雅乐法服。

圣庙崇奉。癸巳年，金亡于汴，特取孔元措还东平，依旧袭封衍圣公，主祀事。奉扎鲁火赤也可那演胡都虎、斡鲁不众扎鲁火赤那演言语，孔氏子孙一十五家，亚圣颜子后八家，邹国公后二家，庙户依旧百户，计一百二十五户。奉

上丝线、颜色、税石、军役大小差发并行蠲免。上项户计，尽行豁除。下属州县所管，诸路历白银一半，修宣圣庙。益都、东平两路尽数分付袭封孔元措，修完曲阜本庙。

世祖皇帝中统三年，特差杨庸充庙学教授。至元十九年八月，宣召五十三代孙前袭封衍圣公洙赴

阙朝见。

玉音奖谕。特授

宣命国子祭酒提举浙东道学校事。

成宗皇帝至元三十一年，

诏曰，孔子之道垂宪万世，有国家者所当崇奉。元贞元年，

特授五十三代孙治中议大夫袭封衍圣公。大德二年春，守臣按檀不花首出泉币万缗，请于

朝重建庙庭。

敕赐田五千亩，复洒扫户二十八。

命翰林学士阎复书其事于石。

武宗皇帝大德十一年，加封大成至圣文宣王。制曰，盖闻先孔子而圣者，非孔子无以明。后孔子

而圣者，非孔子无以法。所谓祖述尧舜，宪章文武，仪范百王，师表万世者也。朕纂承丕绪，

敬仰休风，循治古之良规，举追奉之盛典，加号大成至圣文宣王，遣使阙里，祀以大牢。呜

呼，父子之亲，君臣之义，永惟圣教之尊。天地之大，日月之明，奚罄名言之妙。尚资神化，

祚我

皇元。主者施行。至大元年七月，

诏以银币牲牢致祭。

仁宗皇帝至大四年十月，

诏以银币牲牢致祭。

英宗皇帝延祐七年四月，

诏以白金一百五十两，锦绮杂綵表里各一十三段，遣说书王存义诣鲁，以大牢祀孔子。

上手香加额以授之。

文宗至顺二年正月十一日，加封孔子父齐国公叔梁纥为启圣王母鲁国太夫人颜氏为启王太夫人。文宗至顺二年正月十一日，加封伯鱼母郚国夫人亓官氏为大成至圣文宣王夫人。

文宗至顺二年正月十一日，加封子思沂国公为沂国述圣公。

大明洪武元年三月初四日，太祖高皇帝亲笔谕孔氏子孙祭酒孔克坚，

吾闻尔有风疾在身，未知实否。然尔孔氏非常人也，彼祖宗垂教于世，经数十代，每每宾职王家，非胡君运去，独为今日之异也。

吾率中土之土，奉

天逐胡以安中夏，虽曰庶民，古人由民而称

帝者，汉之高宗也。尔无疾称疾，以慢

吾国不可也，

谕至思之。元年八月十一日。钦奉

诏赦。内一款节，该孔子曲阜庙庭，已尝遣使致祭，其袭封衍圣公并世袭知县，并如历代旧制，仍免孔氏差发。元年十一月十四日，

谨身殿内

上对百官，谕孔子五十五代孙祭酒孔克坚曰，老秀才近前来，你多少年纪也。对曰，臣五十三岁。上曰，我看你是有福快活的人，不委付你勾当，你常常写书与你的孩儿。我看资质也温

厚，是成家的人。你祖宗留下三纲五常，垂宪万世的好法度，你家里不读书，是不守你祖宗法度，如何中。你老也常写书教训着，倦怠惰了。于我朝代里，你家里再出一个好人呵不好。二十日，于谨身殿西头廊房下奏

上位曲阜进表的回去，臣将

主上十四日戒谕的

圣旨，备细写将去了。

上喜曰，道与他，少吃酒，多读书。元年十二月，仍封孔子五十六代孙孔希学为袭封衍圣公。元年十二月十九日，钦奉

圣旨，孔氏子孙皆免差发，税粮有司依例科征。二年十二月十二日，遣五十四代孙国子祭酒孔克坚代祀宣圣回京，

御制诗以遣之。三年六月初三日，

诏改封狱渎等神，惟存先圣王爵旧号。六年八月二十九日，皇帝御端门，文武百官早朝。

上召衍圣公孔希学问曰，尔年几何。对曰，臣三十有九。

上曰，今去尔祖孔子历年几何。对曰，近二千年。

上曰，年代虽远而人尊敬如一日何也，为尔祖明纲常、兴礼乐、正彝伦，所以为帝者师，为常人教，传至万世，其道不可废也。且尔祖无所不学，无所不通，故得为圣人。如问礼于老聃，学琴于师襄之类，此谓学无常师。非特如此，楚王渡江，得一物，其大如斗，其赤如日，其

甜如蜜，众皆不知。遣使问于尔祖，曰，此萍实也。问何以知之。尔祖曰，昔闻诸童谣云。

童子之言，尔祖尚记之不忘，况道德之奥者乎。今尔为袭封，爵至上公，不为不荣矣，此非尔祖之遗荫欤。朕以尔孔子之裔，不欲于流内铨注，以政事烦尔，正为保全尔也。尔若不读书，孤朕意矣。且人年自八岁至弱冠，多昏蒙未开，不肯向学。自冠至壮年有室，血气正盛，百为营营，亦无暇好学。尔年近四十，志虑渐凝定，见识渐老成，正好读圣人之书，亲近明师良友，蚤夜讲明道义，必期有成。学成之后，四方之人知尔知能，俱来执经问难，且曰，此无愧孔氏子孙者，岂不美欤。然四体之勤，乃德之符，步履进退，亦必安详，不可欹斜飞舞，久久习熟，遂为端正人士。朕今婉曲教尔，尔其自择。还家亦以此教子孙可也。勉之哉，勉之哉。七年二十二日，礼部刘尚书等官于

奉天门奏。奉

圣旨，恁写出汉、唐、宋待孔氏子孙典故将来，我就定夺将去，钦此。当月二十四日，本部刘尚书等官，于

武英殿将汉、唐、宋待孔氏子孙典故进奏。钦奉

圣旨，衍圣公与免本户税粮三十顷，余田起科。族人田土，依旧纳粮免差。十一年十二月十七日，勅袭封衍圣公孔希学。十年，诏重修宣圣庙。十二年，复增修饰。永乐十四年，又撤其旧而新之。成化十八年，重新鼎建。宣德元年，遣太常寺寺丞孔克准，诣阙里致祭。

皇上嗣位改元，肇举盛礼，大享群祀。凡名山、大川、丘陵、坟衍、古昔圣贤有功于天地者，咸秩叙而祭之。惟阙里为先圣所生之地，庙貌陵寝咸在于斯，故特命宣圣五十五代孙太常寺寺丞

克准，廷受香币来祭，重其事也。是年三月三日，抵鲁，諏日择士。十一日乙巳，奠祭如仪，自先师而下，四配、十哲，两庑凡九坛，俱用太牢，恩至渥也。是夜，天清气朗，神悦人怡，咸以为

皇上诚敬所致。臣彦缙等窃思汉、唐而下，历代帝王虽尝以太牢致奠，特一时之事耳，我朝自太祖高皇帝，

太宗文皇帝，

仁宗昭皇帝，及我今

上皇帝，圣圣相承，恩同一日，俾庙貌增辉，尼防益秀，述幸往来，又伸祭奠，宠数稠叠，不一而足，实从古所未有也。臣自弱冠，早袭恩封，优待之隆，著为令典，臣之遇不胜感激。但资稟庸愚，弗能补报，惟奉法修职，日歌天保，仰五云以祝万寿而已。谨将御制祭文刻诸坚珉，用垂永久。时宣德元年三月十一日。宣圣五十九代孙袭封衍圣公臣孔彦缙谨识。曲阜县世职知县臣孔克中立石。景泰元年，遣翰林院侍讲吴节诣阙里致祭。成化元年，遣吏部右侍郎尹旻诣阙里致祭。成化十二年冬，

诏天下孔子庙祀加乐舞为佾，筮豆为十二。遣翰林院学士王献賚香币，诣阙里祭告。褒崇先圣礼乐，记

皇帝嗣登大宝之十有二年冬，诏天下孔子庙祀加六佾为八，筮豆十二。爰用遣官，恭行昭告。于是太子少保吏部尚书兼文渊阁大学士臣商辂，以春祀前一日诣文庙，行释菜礼告，翰林院学士臣王献乘传诣阙里，行释菜礼告，使命必简文学之臣，重其事也。祀礼虽有隆杀之殊，一乎

诚也。祝辞出自

圣制，香币颁之内帑，俨乎天颜之俯临也。乐舞之增，器数之加，未告弗敢先，既告弗敢后，肃乎帝心之对越也。裸将之夕，星月澄

霁，纤云不兴，昭乎神明之歆格也。礼既告成，袭封衍圣公臣孔弘泰，率诸族人少长，趋列稽首。言曰，

天子褒崇先圣，礼乐等之祀天享地，诚旷古之罕闻，斯文之大庆，岂特臣一家之私荣而已哉。宜有纪述，以垂永世。时山东按察司付使臣陈相、臣张珩、金事臣毕瑜、布政司参议臣杜毓、都司都指挥金事臣金荣，闻命骏奔，恪共祀事，亦恳申前请不可辞。臣猷窃惟吾夫子之道，如天之高，无不覆幬，如地之厚，无不持载，如日月之代明，如四时之错行，其法具于君臣、夫妇、长幼、朋友，其功著于易、书、诗、礼、乐、春秋，所以立生民之极，开太平之运，历代人主赖之，咸致尊崇，然未有礼明乐备如今日者也。呜呼盛哉。或曰，尧、舜、禹、汤、文、武，皆圣人也，祀乡之，不得视郊社。孔子有德无位，宠用斯礼，得无过乎。且成王、周公有大勋劳，特用天子礼乐，君子讥之。以孔子之圣，岂复有加于周公者哉。嗟夫。此我国家甚盛之举，固非肤于闻见者所能测识之也。当周之衰，王政陵夷，彝伦攸斁，使天之不生孔子，则天下贸贸焉莫知所适，孰知所以为尧、舜、禹、汤、文、武之道者邪。夫惟不知，故不行，不行则不流于夷狄禽兽不止。所以维持斯道永久而弗坠者，果孰之力欤。周公之功，人臣之分也，孔子之圣，万世之师也。师其教而图其所以为报，虽天下之尊，礼之至也。传曰，夫子之道不啻天地也。又曰，其功乃有贤于尧舜者，岂不信哉。仰惟

皇上德位隆大，克当制礼乐之任，自

祖宗列圣，以人文化成天下，于兹百年，又当聿兴礼乐之时，而讲正修明，自孔子始，可谓知所本矣。臣献窃禄于朝，于礼乐大端，漫不之省，误膺涣命，夙夜祗惕，思所以副

皇上尊师重道之盛心，尚当博稽古典，入封黼座，俾朝廷大制作，前无所遗，后无所议，以昭一代文明之治，顾不伟欤。呜呼，臣愚何足以知之。谨记。时成化十三年，岁次丁酉闰二月丁巳。

赐进士第翰林院学士奉政大夫兼修

国史经筵讲官钱唐王献书。

浙江衢州东隅里老执结为孔绳实系南宗嫡长宗孙乞分豁祭田粮额事

〔浙江衢州孔氏南宗族人争袭五经博士检附西安县明朝弘治正德年间原档证明宗支源流（二）（〇一〇四）之九〕

东隅一图里老邹数等今于

执结为褒崇圣裔以隆治化事。依奉勘据本图带管民籍孔绳即孔彦绳供，年五十三岁，系宣圣五十九代嫡长宗孙。始由四十八代祖袭封衍圣公孔端友，原系山东曲阜人氏，于宋建炎年间，同男孔玠并四十七代祖中奉开国男孔传俱扈从高宗南渡，赐居衢州。绍兴年间，诏立家庙，赐田五顷，以供祭祀。自四十八代孔端友至五十三代孔洙，袭封衍圣公爵，历传六代。宋毁建元。至元十九年，世祖召洙赴阙里，议袭公爵。洙因本枝祖坟俱在衢州，不忍废离，愿让爵与山东曲阜宗弟孔治承袭，赐洙国子祭酒兼提浙东学校，归守江南，承奉庙祀祭，扫祖墓。备载志鉴纲目等书。及节奉

诏书勘合事例，优免一应差役，蒙赐祭田。宋、元之时俱免粮额。逮至圣庙洪武年间，初造黄册，以轻则民田入额起科。后于洪武十九年，因有民人王希达，随母改嫁

来家，相依住过，冒投同籍，本人为事累及，前田抄没入官，改科重粮壹百貳拾陆石零，以致子孙输纳艰难，岁祀不敷。近蒙本府知府沈 到任以来，查见孔洙让爵之后，一向有缺官职奉祀，深加悯恤。具本内开，阙里子孙袭封衍圣公爵，已有定制外，乞将衢州孔端友嫡派子孙一人，比照宋臣朱熹事例，添授五经博士一员，以主祭祀。仍乞将旧赐田亩，照依原税输纳，本府官仓支給，以供洒扫祭奠，等因。奏奉

钦依事例，蒙行查勘。缘南渡孔端友生男孔玠，玠生孔搢，搢生孔文远，文远生孔万春，万春生孔洙，其洙无嗣，立孔传八世应继孙孔思许承绍，思许无嗣，立亲弟孔思俊子克忠承继，克忠生孔希路，希路生孔议，议生孔公诚，公诚生孔彦绳。见存的系孔端友遗流正派嫡长宗孙，家谱可照，不系疏远旁枝，身家并无过犯。及旧赐祭田，初无粮额，续以轻则起科，后蒙改征重粮。委的靠累输纳不前，乞赐转达分豁。等情。据此。尤恐不的，再三研审，及查黄册相同，中间果无违碍。保结如虚，甘罪无词。执结是实。

弘治十八年十月

日

里长 邹 敬
老人 赵 麟 结

衢州知府沈杰为条陈孔氏家规以彰圣教事

〔整治孔氏子弟违犯家规（四）（〇七三六）之十八〕

孔氏家规

正德元年正月二十四日，浙江衢州府知府臣沈杰谨奏。为条陈孔氏家规以彰圣教事。臣由进士出身，任浙江衢州府知府，因见本府西安县南隅地方，原有

先师孔子家庙一所，及宋时旧赐祭田五顷，遗存正派子孙相传掌管，供祭不缺。臣谨考

宋朝大明一统志及寰宇通志、续资治通鉴纲目、宋史诸书，俱载孔子四十八代孙孔端友，在宋时袭封衍圣公。建炎年间，端友与其子孔玠，并从父中奉大夫开国男孔传，俱扈从高宗南渡，

赐家于衢，照阙里規制，建立家庙，赐田立祀，子孙皆袭爵封，历传圣公五代。宋殁。大元至元十九年，世祖宣端友之孙衍圣公孔洙赴阙，议令袭爵。孔洙因本支累代圣公坟茔在衢，难以弃离，况曲阜子孙守护先茔有功于祖，情愿让爵与曲阜宗弟孔治承袭公爵。世祖欢曰，宁违荣而不违道，此乃真圣人之后也。赐孔洙以授国子祭酒兼提举浙东道学校，归守江南庙墓，南北遂为二枝。当将宋时给赐袭封衍圣公印信进缴于朝，迨今子孙相传，在衢分立

二十余户，登籍百有余人，世守宗祀不绝。但先朝钦赐祭田五顷，中间多有硗瘠，每岁征纳官粮壹百叁拾余石，子孙不能征纳，以致岁祭祀不敷，臣甚悯恤。遗存家庙，子孙承祀掌管，漫无统纪，衣冠祭仪混同流俗。以经比照宋臣朱熹子孙世袭博士两处祭奠事例，欲乞

圣恩，除原籍山东子孙世袭衍圣公照旧袭封，已有定制，万世遵行，乞将衢州孔端友子孙一人，添授以世袭翰林院五经博士一员，以主家庙，祭祀看守各代圣公坟茔，统领见存子孙。仍乞将本户旧赐祭田，照依原税数目，每岁依期上纳本府官仓，或儒学仓，按月支給与米貳石，以供洒扫祭奠，岁终将用过数目，开报官府查考。如此则家庙不至于隳废，祭田不至于变卖，子孙不至于流移，圣裔不至于淹没。千秋万载，足以见

圣朝文明之化，普及华夷，

皇上崇儒之心，无间南北，而宣圣在天之灵自将默佑

圣明，以衍无疆之祚矣。等因。具本奏奉

孝宗皇帝圣旨，该衙门看了来说。钦此。钦遵。续蒙礼部会同吏部，逐一备查明白，及查志记通鉴，俱载其事，俱有理。但自孔端友至今，历世远代，子孙蕃衍，傍正混杂，其旧赐祭田，年收租税，未审能给修庙供祀，必须查勘明白，事情可否有归。合无本部移咨都察院，转行浙江巡按监察御史，行委府县查勘孔端友嫡派长房子孙，推保相应一人，取具官吏各该供结，起送赴部。旧赐祭田应否免科，以为修庙岁享之费，逐一查明。至日本部议处具奏，取旨

上裁。本年二月二十四日礼部尚书张 等官，于

奉天门具题。次日，奉

孝宗皇帝圣旨，是。钦此。钦遵。已经移咨都察院，转行浙江巡按监察御史，见在取勘具结送部。

除遵奉外，切照衢州一派子孙，自宋衍圣公孔洙让爵与阙里子孙孔治承袭之后，由元世祖至于我

朝

太祖高皇帝继元以来，

列圣相传，尊崇旧制百数年，两派子孙俱无争异。恐后在衢子孙繁衍，愚哲不同，诗书少习，礼义或乖，又恐冒收异姓，紊乱圣派，诡寄田地，冒免差徭，未免貽玷斯文，无以倡率文教，必须严立防范，庶可杜绝其弊。臣系守土之官，不敢辄擅专行。今修家规七款，伏乞

圣恩敕命礼部，斟酌定制，行令布政司颁降榜文，张挂于孔氏家庙，常川晓谕，使其子孙绳绳遵守，毋得妄行，永为规戒，则先师孔子之道，倡行于家族，统布于四海，垂及万世，自我

圣天子龙飞九五之日为始矣。如此则天下幸甚，斯文幸甚。缘系修陈家规以彰

圣教事理，未敢擅便，为此开坐具本，亲赍谨具奏

闻，伏候

敕旨。

计开

一、遵

制典。臣切照衢州一派子孙，自宋衍圣公孔洙让爵与阙里子孙孔治承袭公爵，元世祖深加奖

谕。自我

太祖高皇帝继元以来，

列圣相承，遵崇旧制。在衢子孙看其坟墓，优免杂项差徭。曲阜子孙嘉其守护先茔有功于祖，照旧袭封，千载不易。即今百余年未闻有覬覬争竞之人。窃恐后世两派子孙互相嫌隙，妄起争端，不惟有违

圣朝制度盛典，又恐背忘伊祖德让之风，合无严立规戒，行令在衢子孙永遵制典，恪守祖风。有违者以不忠不孝论，置之重典，永不叙录。法令昭明，人无异议。

一、端教源。臣添授世袭博士，无非欲其统领流寓家庙子孙。主典为博士者，必须修明圣教，身先督率，躬行实践，庶不有负

朝廷褒崇圣裔之盛典。博士若倚官威欺凌尊长，败伦伤化，本家如有一切不公不法之事，许子孙具告。浙江巡按监察御史径自提问

发落。如此则教源可端，而圣化行矣。

一、示劝惩。臣以厚彝伦，以彰圣德。臣切恐子孙众多，贤愚不一，必须严立劝惩，庶免有玷圣祖。合无立塾于庙左右，平昔有学之人，以礼敦聘充为教读，将年幼子孙旦暮训诲，习读经书，讲明义理。中间有入府县学者，照旧选入，考有成校，收补廪增，照例科贡，以明录用。其有善者，以礼待之，恶者，以法治之。敢有子孙奸顽不守家规，结交恶党，三五成群，赌钱饮酒，为非为恶，生事害人，行凶杀泼，倚强欺弱，教唆词讼，败伦伤化，不公不法，轻则以从博士家规戒，重则移明